

Bromeis e Caminada ils «Piuniers alpins 2013»

L'International Mountain Summit onurescha dus Grischuns

■ (anr/fa) Per la 5avla giada è vegnì realisà a Brixen il festival IMS ch'è stat en l'insaina da las muntognas. Quest onn ha la giuria undrà las prestaziuns da l'architect Gion A. Caminada e da l'ambassador da l'aua Ernst Bromeis. A Brixen al pè da las Dolomitas ha lieu dapi l'onn 2009 mintgamai d'atun l'International Mountain Summit (IMS). L'intenziun da quel è dad unir las amaturas ed amatur da las muntognas, e quai da tut il mund. La passiuin per la muntogna duess colliar ils ospes, ils giasts ed ils participants. In intent da quest «Gipfeltreffen» dad alpinists, raividiers ed amatur da las muntognas è ultra da quai era dad onurar prestaziuns extraordinarias en il mund alpin. Quest onn han surdà ils organisatur da l'IMS il premi a tschintg persunas, tranter quels er ils dus Rumantschs, l'uschenumnà ambascadur da l'aua *Ernst Bromeis* d'Ardez e l'architect *Gion A. Caminada* da Vrin.

«Il titel forsà in zic exagerà»

Suenter il giarsunadi sco scrinari da construcziun ha Caminada frequentà a Turitg la scola d'art applitgà. Al Politecnicum da Turitg (ETH) ha'l alura fatg il studi da diplom supplementar d'architettura ed avri a Vrin ses biro d'architettura. Dapi l'onn 1998 è Gion A. Caminada activ a l'ETH

sco docent e dapi il 2008 sco professor extraordinari per architettura. Dapi il 1994 ha'l survegnì per sia lavur divers premis, sco per exempel il Bruckmann Umweltpreis München u il Premi d'architettura internaziunal «Sexten Kultur». Quel surdat la vischnanca Sexten im Hochpustertal en il Tirol dal Sid per novas furmas da construir en las Alps. Ultra da quai ha el survegnì era il Premi cultural dal chantun Grischun. La giuria ha surdà a l'architect Caminada il premi «Alpenpionier Award 2013» per sia lavur architectonica reconuschida sin palc internaziunal: Che sia architettura saja colliada cun la tradiziun istorica ed architectonica ed è uschia era fitg autentica, èsi vegnì ditg en la laudatio. «Jau hai gì plaschair da quest premi che mussa che mia lavur vegn apprezzada», di Gion A. Caminada, «il titel piunier è in zic exagerà, jau empruv da star consequentamain vid la chaussa, tschertgond las valitas pli fundamentalas, senza vulair mintga di stgaffir la sensaziun.»

«Renconuschientscha er da l'exteriur fa bain»

Suenter il studi da sport a l'universitad da Basilea e sia scolaziun sco trenader da sport d'elita Swiss Olympic ha trenà Ernst Bromeis numerus atlets. Tranteren ha'l lavurà sco redactor tar il Radio Ru-

mantsch. Da l'onn 2008 è el diventà independent. En emprima lingia lavura'l dapi quella giada sco ambascadur da l'aua e nuda der a favur da la protecziun da questa resursa custavla. Actualmain s'engascha'l sper ses projects dal «miracul blau» per salvar l'anteriura Büvetta Nairs da Tarasp e la transmidar en in center d'aua internaziunal. La giuria ha onurà a Bromeis «per sia gronda lavur a favur da l'aua, nus sperain da contribuir cun noss premi ina part per realisar il center d'aua internaziunal», èsi vegnì ditg en la laudatio. L'onurà sa legra dal premi: «I fa bain a vesair la reconuschientscha da l'exteriur per mia lavur», di Ernst Bromeis, «il premi signifitga però er in sustegn per las sfidas actualas sco il center d'aua u era l'organisaziun da l'emna da l'aua en Engiadina Bassa.» Las autras persunas che han survegnì in premi èn il medi d'urgenza Hermann Brugger da Bruneck activ en las muntognas dal Tirol dal Sid, il scrinari tudestg Josef Eham per sia lavur innovativa e tuttina tradiziunala e l'Austriaca Martha Schulz. Ella fa il marketing per sis regiuns da skis en il Zillertal, il Tirol oriental ed en Kärnten. Uschia mussa la vicepresidenta da la Wirtschaftskammer Österreich a l'avis da la giuria «co ch'ins po manar cun success territoris da skis».



Ils onurads (da san.) Ernst Bromeis e Gion A. Caminada.